





DOHAS


1. Rang duniya ke alag alag,
Alag yeh kaahe hoye,
Maanush bhi so alag alag,
Kaahe ek na hoye.
2. Na jaane tu mujhko panthi,
Asovan kaahe roye,
Raat gayi ab bhor bhayi,
Rone se kuchh na hoye.
3. Patjhad kahe bahaar se,
Tu kya jaane moye,
Maati mein mil jaaye tu,
Main na chhordun toye.
4. Sookhi maati taras gayi,
Tarse kuchh na hoye,
Garje badal akash mein,
Barkha kyon na hoye.
5. Chamke taara gagan mein,
Gagan ka woh na hoye,
Kuch na mera kuch na tera,
Kuch na kisi ka hoye.
6. Jab kuch na tera sab bhagwan ka,
Tu kya dega moye,
Pyar miley so kaafi hai,
Pyar hi sab kuch hoye.
7. Do din mere do din tere,
Do din sabke hoyen,
Do banen na chaar kisi ke ,
Phir kaahe hum royen.
8. Sona chaandi gehna moti,
Kuch na mera hoye,
Kaahe dhundun jag mein tohe,
Jab tu dil mein hoye.
9. Panchhi udta aaye hai,
Udta hi woh jaaye,
Jo bhi jag mein aaye hai,
Jag woh chhorde jaaye.


- 
10. Raam naam japo tum bhaiyya
Ram hi sab kuch hoye,
Mil jaayegi sita maiyya
Ma hi sab kuch hoye. .
 11. Main na janun kuch na janun,
Jaane sab hai tu,
Teri maala japta hun main,
Bin tere kya hoye.
 12. Dil laage jag mein tera ,
Jag tera na hoye,
Kar le aaj kare jo bhaiya,
Kal jaane na koye.
 13. Naam hai tera duniya mein,
Naam se kuch na hoye,
Naam le so ram ka le
Ram hi sab kuch hoye.
 14. Machhli sagar mein tadpe,
Tat pe bhi tadpe,
Miley na sukh kisi ko bhi,
Tat pe tu na hoye
 15. Haryali jab dikhe tujhe,
Dekh haryali tu,
Tarsengi aankhe phir teri,
Haryali jab na hoye.
 16. Jitna uncha jaaye hai
Utna jhuk kar chal,
Paon taley dharti hai teri,
Bin dharti kya hoye.
 17. Boodha durbal baitha hai
Saans use na aaye,
Samay samay ki baat hai baba
Sab samay se hoye.
 18. Na koi raja na hi rank,
Na mandir masjid hoye,
Puja kar le sajde kar le
Vishvas kaahe na hoye.

- 
19. Girte aansoo aankh se,
Aankh sookhi na hoye,
Prem ki gathri baante ja,
Gathri halki na hoye,
20. Ujjwal ho jo tera man,
Dhan tera yeh hoye,
Rah dikhaye toye musafir,
Jab andhiara hoey,
21. Teri vaani sach na ho,
Jhuth bole na hoey,
Sach na bole jo tu bande ,
Mukti kaise hoye.
22. Kismat hove apni apni,
Kyon kismat ko roye,
Anokha hai yeh jeevan mela,
Upar neeche hoye.
23. Pinjare mein baitha hai panchhi,
Pinjare mein woh roye,
Udna hai jo kaam kisi ka,
Bund woh kaahe hoye.
24. Surdas dekhe na kuchh bhi,
Surdas jo hoye,
Dekh sakey jo sab kuch bhaiya,
Surdas kaahe woh hoye.
25. Chidian chug gayin khet mora,
Kuch na keh kar moye,
Phal milega bhaiya toye,
Jaisan beeja boye.
26. Dil ki baat suno bhai sadho,
Dil mein pyaar basey,
Meethi vaani nikle dil se,
Dil meetha hi hoye.
27. Sheet lage hai sabko bhaiya,
Kaanpe kuch na hoye,
Le jaaayegi mrityu sabko,
Dar laage kyon toye.
28. Na koi jeete na koi haare,
Jeevan khela hoye,
Bela sabka aavega,
Bela sabka hoye.
29. Baaten karke kuch na hoga,
Baaton se kya hoye,
Haath pakad kar chal tu panthi,
Laabh donon ka hoye.

- 
30. Bela kya dekhe hai tu,
Bela kuch na hoye,
Samay samay ki baat hai panthi,
Raat savera hoye.
31. Shabd ki tezi aisan hai,
Bijli jaisan hoye,
Chhuta teer kamaan se bhaiya,
Vapas naahin hoye.
32. Muli khet mein hoti hai,
Sabke khet mein hoye,
Kiske khet mein kaisan muli,
Yeh jaane na koye.
33. Na koi apna na paraya,
Na koi dushman hoye,
Jag mein saare hain musafir,
Tu bhi panthi hoye.
34. Bhor bhayi ab uth tu panthi,
Baithe kuch na hoye,
Baithe baithe miley na kuch bhi,
Kismat teri roye.
35. Nazar na aaye jo bhi tohe,
Woh bhi sach hi hoye,
Puja karta hai tu jiski,
Kya bhagwan na hoye.
36. Na koi raja na fakir,
Na koi rona roye,
Ram raj bane bhai aisan,
Dil mein Ram jo hoye.
37. Patti kahe gulab se,
Mohe chubhan na hoye,
Khelun main kaanton se nisdin,
Chubhan kaahe ko hoye.
38. Dekhe na bane hai bhaiya
Dekhe sach na hoye,
Sumiran kare tu Ram ki,
Kya bhagwan na hoye.
39. Yaad aaye hai teri maiyya,
Teri yad sataaye,
Kahan gaya woh bachpan mera,
Kahan dhundun main toye.
40. Dukh jab aavey ghar mein toreya,
Saahas dukh sangh hoye,
Ro le tu jitna bhi roye,
Sukh na chhordey toye.

- 
41. Kitna dur tu apne se,
Doori kaahe hoye,
Apne ko na jaane bhaiya,
Kaun jaanega toye.
42. Ram ki vaani bolo bhaiya,
Sach hi kaaha hoye
Sach mein shakti aisan hai,
Jaisan Ram mein hoye.
43. Udna hai so ud jaayega,
Kaahe rona roye,
Leela hai so bhagwan ki,
Tera kuch na hoye.
44. Agan lage jab man mein tore,
Shanti kaisan hoye,
Raakh baney phir sab kuchh bhaiya,
Manwa bhi to roye.
45. Kaahe rona aaye hai,
Ant samay ka hoye,
Samay na mera na tera bhaiya,
Samay to sabka hoye.
46. Baraf pade hai choti per,
Choti kaahe roye,
Thand laage barabar sabko,
Odan naahi hoye.
47. Sabko tolay maati bhaiya,
Maati sab ban jaaye,
Maati na ho kuch na ho,
Maati sab kuch paaye.
48. Kaisan beetey jeevan tera,
Tera haath na hoye,
Karmon ka yeh phal hai bhaiya,
Jo miley hai toye.
49. Dekhe tu jab apne ko
Sheeshan mein kya hoye,
Na pehchane apne ko ,
Dil mein khot jo hoye.
50. Ghar aaye jo shatru tere,
Shatru naahi hoye,
Bhagwan ka hi rup hai bhaiya,
Chehra jaisan hoye,
51. Dhaaran karta bhes anek,
Manush hi to hoye,
Bhes na badle bhagwan bhaiya,
Bhagwan eka hoye.

- 
52. Peeda tere dil mein hoye,
Yad kare tu moye,
Basey hai bhagwan dil mein tere,
Sumiran har dam hoye.
53. Kaahe baitha tu udaas,
Man kyon vyakul hoye,
Dil mein ja kar dekh tu bhaiya,
Main mil jaaun toye.
54. Sher jangal ka raja hai,
Dar laage hai toye,
Raja sabka ek hi hai,
Sher bhi darta hoye,
55. Katha suno tum sabki bhaiya,
Sun le kuch na hoye,
Kiski baat mein kitna sach hai,
Shikhsha miley hai toye.
56. Soch samajh ke chal tu bhaiya,
Sab jaane na koye,
Kis se poochhe rah tu apni,
Rahzan hi na hoye.
57. Ik din asha phir nirasha,
Jeevan shaili hoye,
Kar le tu jo kar le bhaiya,
Nirantar kuch na hoye.
58. Nanak naam jahaz hai ,
Nanak dil mein hoye,
Paar lage phir kashti teri,
Rona kaahe roye .
59. Ganga jal tu piye hai,
Us se kuch na hoye,
Nikle na tu paap ke jag se,
Mukti kaisan hoye.
60. Mukti bin jaaye kahan,
Mukti miley na toye,
Ganga maiyya ke hi tat per,
Mukti mukti hoye.
61. Pehnega jab taj tu bhaiya,
Kaanta bhi sangh hoye,
Paisa paisa kitna paisa,
Paisa khotan hoye,



62. Woh bela bhi yad karo,
Bhaiyan kaisan hoye,
Banbaas huay jab Ram aur Sita,
Laakhan bhi sangh hoye.

63. Aankh khuli hai kaisan bhaiya,
Dikhe na kuch bhi toye,
Ram naam jo man mein naahi,
Manva tera soye.

64. Na maane hai dil jo tera
Dil ko tu samjha,
Nahin chale hai raj usi ka,
Dil na sab kuch hoye.

65. Pura ho jaaye jo sapna,
Sapna naahi hoey,
Kya karega phir tu bhaiya,
Jo sapna pura hoye.

66. Surma dani dekhat hai,
Kaali ankh ko roye,
Kaali ankh se kuch na hovot,
Dil kaala na hoye.

67. Thokar kha kar uth ja bhaiya,
Kankar maar na hoye,
Kis ne kis ko kab giraya,
Jaanat na hai koye.


68. Kalyug ke is yug mein bhaiya,
Aankhiyan dhokha khayen,
Dhaaran bhes fakir ka,
Ghar pe dushman aayen.

69. Jaana hai to sabko bhaiya,
Jaane bin na hoye,
Man mein aisi mamta baithe,
Mamta naahin jaaye.

70. Rozi roti nemat hai,
Bhule se na hoye,
Kal ki kya khabar hai panthi,
Roti miley na toye.

71. Gaaye panchhi apna gaana,
Panchhi daal pe soye,
Ghar apna hai apna bhaiya,
Ghar jaisan bhi hoye,

72. Neend na aaye tujhko panthi,
Neend se kuchh na hoye,
Chain milega tujhko bhaiya,
Manwa shaant jab hoye.

- 
73. Chalte reh tu chalte reh,
Chalte reh chalte hi kuchh hoye,
Anginat na saans re panthi,
Rukne se na hoye,
74. Yad rahe tujhko he bande,
Banda kiska hoye,
Bhagwan tere saath hi hai,
Rah jab apni khoeye.
75. Ghar tere jo aaye mangta,
Bhikari naahi hoye,
Ishwar ka hi rup hai bhaiya,
Tujh se kum na hoye.
76. Pawan chale jab ulti bhaiya,
Dar laage kyon toye,
Chalti hai woh is liye,
Uncha tujhe udaaye.
77. Kashti dubne laage hai,
Roye se na hoye,
Toofan se kyon dare musafir,
Ram uska bhi hoye.
78. Moh maya ke jaal se panthi ,
Bach kar rehna toye,
Moh maya ke jaal mein phans kar,
Nikla naahi hoye.
79. Nao mein baithe nao se puchhe,
Ab kidhar kn jaaun,
Chun le apni rah tu bhaiya,
Puchhan se na hoye,
80. Dukh se tu chhutkara chahe,
Aisan naahi hoye,
Dukh aur sukh judwa hain bhaiya,
Ram aur tu bhi hoyen.
81. Dukh aur sukh donon hi man mein,
Man mein hi yeh hoyen,
Maitri tu baitha le man mein,
Dukh hoye na toye.
82. Jeevan asuvan jaisan hai,
Hanste rote aaye,
Chun le tu bhi rah musafir,
Hanste rote jaaye.

83. Dukh aaye jab ghar ko bhaiya,
Bhaage tu aur roye,
Dukh aur sukh donon hi maya,
Dukh sukh kuch na hoye.

84. Ik khshan rona ik khshan hansna,
Jeevan khshan khshan hoye,
Hans le tu jitna bhi bhaiya,
Rona bhi hai toye,

85. Tat per baitha hai tu panthi,
Tat per aur na koi,
Akela naahi hai tu bhaiya,
Bhagwan sangh jo hoye,

86. Jeevan paani jaisan hai,
Pani behta jaaye,
Samay samay ki baat hai bhaiya,
Samay na rukta hoye,

87. Dayalu ban kar daan kare,
Kuch na tera hoye,
Johli se tu prem jo baante,
Johli bharti jaaye.

88. Bigdi ko bana le bhaiya,
Bigdi kuch na hoye,
Sab nirala hai is jag mein,
Nirala tu bhi hoye,

89. Upar neeche hoye hai,
Samantar naahi tol,
Ik din tera ik din mera,
Uncha naahi bol

90. Barkha dekhat hai tu panthi,
Nadi pukare toye,
Aa kar tat per baitho bhaiya,
Jal le jaaye toye.

91. Kalion se bante hain phul,
Ant kali ka hoye,
Phulan jab murjhaye hain,
Mukti kis ki hoye.

92. Jeevan mrityu khela hai,
Khela khelan hoye,
Haar jeet nahi hai bhaiya
Sabka bela hoye.

93. Maya sab prabhu ki bhaiya,
Raja bhi rank hoye,
Ahankar na kar tu panthi,
Kuch na tera hoye.

94. Janam liya hai tu ne jag mein,
Jag mein aa kar toye,
Wahi mile jo bhagwan chaahe,
Tu bhi uska hoye.

